

Skattavakt PwC

Fréttabréf Skatta- og lögfræðisviðs

Skattavaktin er mánaðarlegt fréttabréf PwC hf. þar sem sérfræðingar á Skatta- og lögfræðisviði félagsins skrifa um athyglisvert efni tengt skattarétti. Leitast er við að gera grein fyrir nýju efni, hvort sem um er að ræða dóma, lög, frumvörp, úrskurði eða stjórnvaldsákvarðanir.

Efnisyfirlit

Ný lög

Lögaðilar og einstaklingar í atvinnurekstri sem eru í vanskilum með virðisaukaskatt, staðgreiðslu opinberra gjalda, tryggingagjald og þing- og sveitarsjóðsgjöld sem hafa gjaldfallið fyrir 1. janúar 2010 geta nú sótt um frest til greiðsluuppgjors á þeim vanskilum til 1. júlí 2011.

Lög um Íslandsstofu - markaðsgjald

Á dögunum voru sett lög um Íslandsstofu („Promote Iceland“) sem ætlað er það hlutverk að efla ímynd og orðspor Íslands, styrkja samkeppnisstöðu íslensks atvinnulífs á erlendum mörkuðum og laða erlenda ferðamenn og fjárfestingu til landsins. Höfuðtekjustofn Íslandsstofu verður markaðsgjald eins og það er skilgreint í III. kafla laga nr. 113/1990, um tryggingagjald

Dómur Mannréttindadómstóls Evrópu - iðnaðarmálagjald

Þann 27. apríl sl. kvað Mannréttindadómstóll Evrópu upp dóm varðandi ágreining Varðar Ólafssonar gegn íslenska ríkinu um lögmæti iðnaðarmálagjalds..

Starfshópur fjármálaráðherra

Fjármálaráðherra hefur skipað starfshóp til að móta og setja fram heildstæðar tillögur um breytingar og umbætur á skattkerfinu.



Lög nr. 23/2010

Þann 30. mars 2010 voru samþykkt lög um greiðsluuppgjör á gjöldum lögaðila og einstaklinga í atvinnurekstri. Með setningu laganna er rekstraraðilum í tímabundnum greiðsluvandræðum gefinn kostur á að óska eftir greiðsluuppgjöri á sköttum sem voru í vanskilum þann 1. janúar 2010 fram til 1. júlí 2011 án frekari viðurlaga, að uppfylltum ákveðnum skilyrðum. Standist viðkomandi aðili þau skilyrði verða vanskilin sett á skuldabréf til fimm ára með verðbótum en án vaxta. Þannig verða ekki lagðir dráttarvextir á kröfur sem njóta frests til greiðsluuppgjörs á tímabilinu 1. janúar 2010 til og með 30. júní 2011. Skuldabréfið skal vera til fimm ára með jöfnum mánaðarlegum afborgunum, með fyrstu greiðslu 1. október 2011.

Lögaðilar og einstaklingar í atvinnurekstri sem eru í vanskilum með virðisaukaskatt, staðgreiðslu opinberra gjalda, tryggingagjald og þing- og sveitarstjórnargjöld sem hafa gjaldfallið fyrir 1. janúar 2010, geta sótt um frest til greiðsluuppgjörs. Skilyrði fyrir fresti til greiðsluuppgjörs eru m.a. þau að umsækjandi skal vera í skilum með aðra skatta og gjöld en þau sem að ofan greinir og jafnframt skal umsækjandi vera í skilum með alla skatta og gjöld sem gjaldfalla frá 1. janúar 2010 til og með 30. júní 2011.

Standi aðili sem nýtur frests til greiðsluuppgjörs ekki í skilum með greiðslu skatta og opinberra gjalda sem falla í gjalddaga eftir 1. janúar 2010 fellur frestur til greiðsluuppgjörs niður og dráttarvextir reiknast á vanskil eins og frestur til greiðsluuppgjörs hefði ekki verið veittur. Sama gildir verði bú aðila sem nýtur frests til greiðsluuppgjörs tekið til gjaldþrotaskipta á tímabili frestsins.

Lög um Íslandsstofu

Nýlega voru lög um Íslandsstofu samþykkt á Alþingi. Íslandsstofa er samstarfsvettvangur atvinnulífs og stjórnvalda um stefnu og aðgerðir til þess að efla ímynd og orðspor Íslands og mun stofan taka við öllum réttindum og skyldum Útflutningsráðs Íslands. Íslandsstofa mun veita alhliða þjónustu og ráðgjöf í því skyni að greiða fyrir útflutningi á vöru og þjónustu. Einnig mun hún vinna í því að laða til landsins erlenda ferðamenn og erlenda fjárfestingu til landsins með því að upplýsa erlenda fjárfesta um kosti Íslands og vera stjórnvöldum til ráðuneytis um fjárfestingarmál. Íslandsstofa mun einnig leika lykilhlutverk við kynningu á íslenskri menningu erlendis.

Íslandsstofa mun m.a. fá tekjur sínar með markaðsgjaldi, 0,05%, sem lagt er á gjaldstofn til greiðslu tryggingagjalds. Um álagningu og innheimtu fer eftir ákvæðum laga nr. 113/1990 um tryggingagjald. Markaðsgjald má draga frá tekjum þess rekstrarárs þegar stofn þess myndaðist. Í bráðabirgðaákvæði í lögnum kemur fram að verði ekki annað ákveðið með lögum falli markaðsgjaldið niður frá og með 1. janúar 2013, þó þannig að álagning fari fram 2013 vegna gjaldstofns ársins 2012.

Dómur Mannréttindadómstóls Evrópu nr. 20161/06

Þann 27. apríl sl. var kveðinn upp dómur Mannréttindadómstóls Evrópu í máli Varðar Ólafssonar gegn íslenska ríkinu. Í málinu er deilt um lögmæti iðnaðarmálagjalds en það er 0,08% gjald sem lagt er á allan iðnað í landinu og rennur til Samtaka iðnaðarins í því skyni að vinna að eflingu iðnaðar og iðnþróunar í landinu. Málavextir voru þeir að Vörður höfðaði mál gegn íslenska ríkinu þar sem hann taldi að iðnaðarmálagjald stæðist ekki ákvæði mannréttinasáttmála Evrópu en Hæstiréttur hafði komist að þeirri niðurstöðu árið 2005 að álagning iðnaðarmálagjalds væri lögmæt. Mannréttindadómstóll Evrópu komst að þeirri niðurstöðu að skylduaðild að Samtökum iðnaðarins með skyldu til að greiða iðnaðarmálasjóðsgjald fæli í sér brot á 11. gr. mannréttinasáttmála Evrópu um félagafrælsi. Úrskurðaði dómstóllinn að íslenska ríkið skyldi greiða Verði 26 þúsund evrur í málskostnað en ekki var farið fram á skaðabætur.

Stafshópur fjármálaráðherra

Samkvæmt fréttatilkynningu frá fjármálaráðuneytinu 19. apríl sl. hefur fjármálaráðherra skipað starfshóp til að móta og setja fram heildstæðar tillögur um breytingar og umbætur á skattkerfinu.

Fram kemur að starfshópnum sé ætlað að skila áfangaskýrslu til fjármálaráðherra eigi síðar en 15. júlí nk. með helstu stefnumarkandi tillögum og tillögum um þær lagabreytingar sem hægt verði að leggja fram til afgreiðslu á haustþingi 2010. Tillögurnar eiga að vera í samræmi við áætlun um jöfnuð í ríkisfjármálum og áætlanir um fjárlög fyrir árið 2011. Lokaskýrslu og heildartillögum skal skilað fyrir árslok 2010.

Helstu sjónarmið sem starfshópurinn skal leggja til grundvallar:

- Að skattkerfið afli tekna í nægjanlegum mæli fyrir hið opinbera, stuðli að jöfnuði lífsskilyrða og hagkvæmri nýtingu framleiðsluþátta og auðlinda.
- Að leggja mat á skattareglur og þyngd skattlagningar á Íslandi í samanburði við lönd með sambærilegt og betra velferðarstig.
- Gæta þarf innbyrðis samræmis í álagningu skatta og í tekjuöflun hins opinbera almennt og skattkerfið þarf að stuðla að markmiðum stjórnvalda í félagsmálum, umhverfismálum og efnahagsmálum almennt.

- Æskilegt að skattkerfið sé einfalt og gagnsætt og því ekki ætlað stærra hlutverk á einstökum sviðum en það getur með góðum móti valdið.

Fjármálaráðherra mun einnig skipa sérstaka samráðsnefnd sem verður vettvangur upplýsingamiðlunar og skoðanaskipta fyrir starfshópinn. Sæti í þeirri nefnd munu eiga fulltrúar tilnefndir af ASÍ, BHM, BSRB, Bændasamtökum Íslands, KÍ, SA, Sambandi íslenskra sveitarfélaga, Samtökum fjármálafyrirtækja og þingflokki allra flokka. Auk framangreinds skal starfshópurinn leita samráðs við sérfræðinga á ýmsum sviðum eftir því sem hann metur æskulegt svo sem í hagfræði, félagsmálum, umhverfismálum, lögfræði og stjórnsýslumálum á sviði skatta og innheimtumála. Þá mun hann njóta ráðgjafar sérfræðinga í skattamálum frá AGS og eftir atvikum frá OECD. Með hópnum starfa sérfræðingar og starfsmenn tekju- og skattaskrifstofu fjármálaráðuneytisins og embættis ríkisskattstjóra

Með fréttatilkynningu 23. apríl sl. kom fram að fjármálaráðherra hefur undirritað skipunarbréf starfshópsins.

Skatta- og lögfræðisvið PricewaterhouseCoopers

Við hjá Skatta- og lögfræðisviði bjóðum upp á margs konar þjónustu, þar með talið ráðgjöf varðandi:

Alþjóðlega skattaráðgjöf · Milliverðlagningu („Transfer pricing“) · Skattlagningu rekstraraðila
Skattlagningu einstaklinga · Virðisaukaskatt · Félagarétt · Samruna, skiptingar og yfirtökur

Starfsmenn sviðsins hafa mikla reynslu og yfirgripsmikla þekkingu á sviði skatta- og Félagaréttar og veita viðskiptavinum aðstoð og ráðgjöf varðandi lögfræðileg álitæfni sem skapast innanlands sem og erlendis.

Til að fá frekari upplýsingar um starfsemina er hægt að hafa samband við eftirfarandi starfsmenn:

Ábyrgðarmaður:
Elín Árnadóttir
sviðsstjóri Skatta- og lögfræðisviðs
Sími: +354 550 5322
elin.arnadottir@is.pwc.com

Ritstjóri:
Ásta Kristjánsdóttir
ráðgjafi/lögfræðingur
Sími: +354 550 5352
asta.kristjansdottir@is.pwc.com

Þessi samantekt felur ekki í sér ráðgjöf af neinu tagi. Ekki ætti að hafast samkvæmt vefriti án þess að fá sérfræðilega ráðgjöf. PricewaterhouseCoopers hf., PricewaterhouseCoopers LLP, hluthafar, starfsmenn og umboðsaðilar bera ekki ábyrgð á upplýsingum sem gefnar eru í þessu vefriti eða aðgerðum sem framkvæmdar eru af hálfu annarra aðila á grundvelli þessara upplýsinga.

©2009 PricewaterhouseCoopers hf. Allur réttur áskilinn. "PricewaterhouseCoopers" vísar til PricewaterhouseCoopers hf. á Íslandi, nema ráða megi af samhengi eða beinum tilvisunum að vísad sé í önnur fyrirtæki í samstæðu PricewaterhouseCoopers International Limited sem öll eru lagalega sjálfstæðar einingar.

PRICEWATERHOUSECOOPERS 

Skógarhlíð 12 · 105 Reykjavík
sími 550 5300 · fax 550 5302
www.pwc.com/is